

明

史

明史卷十四

本紀十四

孝宗

孝宗諱祐楹憲宗第三子也母曰淑妃紀氏成化六年七月己卯生於西宮時萬貴妃方專寵宮中莫敢言及悼恭太子薨後憲宗始知之召育周太后宮中勅禮部命名大學士商輅等乃以建儲請於是年六歲矣是年紀妃暴薨哀慕如成人然以貴妃故深自歛晦十一月立為皇太子二十三年八月己丑憲宗崩九月壬寅即皇帝位詔赦天下以明年為弘治元年丁未掌通政司禮部左侍郎李致省太常寺卿鄧

常恩趙玉芝太監梁芳外戚萬喜等有罪貶謫有差
冬十月丁卯朔汰傳奉官革真人高士封號貶諸法
王佛子追奪勅印儀仗斥還其所乙亥尊皇太后為
太皇太后皇后為皇太后丙子立妃張氏為皇后丁
亥萬安罷戊子杜銘罷壬辰上生母淑妃紀氏尊謚
癸巳吏部左侍郎兼翰林院學士徐溥入閣預機務
甲午免永平災稅十一月辛丑李裕罷癸卯劉敷罷
乙巳召致仕南京兵部尚書王恕為吏部尚書南京
兵部尚書馬文升為左都御史癸丑丑直罷乙卯少
詹事劉健為禮部右侍郎兼翰林院學士入閣預機

務戊午下梁芳李孜省等于詔獄十二月壬午葬憲宗皇帝於茂陵是月免江西湖廣災賦

弘治元年春正月己未始考察在外武臣庚申南京刑部尚書何喬新為刑部尚書二月丁未耕籍田封哈密衛左都督罕慎為忠順王丙辰禁文武大臣毋請託公事三月乙丑朔命吏兵二部疏兩京文武大臣在外知府守備以上姓名揭文華殿壁癸酉幸太學釋奠於先師孔子夏四月庚申天壽山雨雹遣英國公張懋等祭告諸陵五月丙寅命刑部右侍郎彭韶巡視浙江秋七月庚午免湖廣災稅八月乙巳寇

犯山丹永昌辛亥犯獨石馬營丙辰減雲南銀課九月已知慮囚冬十月乙未賑成都諸府饑戊申周洪謨罷庚戌代王獻海東青貽書却之曰朕靡敢盤于遊畋詩不云乎人之好我示我周行叔祖或有讒言其時以益朕乙卯發帑銀十五萬兩賑湖廣四川饑丁巳召南京兵部尚書耿裕為禮部尚書十一月辛巳復賑湖廣饑甲申妖僧繼曉伏誅十二月甲午賑鄖陽襄陽荊州流民戊申賜京師窮民布己酉除中外文武官過名自是歲一行之癸丑賑應天饑丁巳命公侯伯駙馬應襲子孫入國子監讀書是冬免開

封諸府及湖廣災賦

二年春二月癸巳四川饑截湖廣歲漕米二十萬石
賑之辛丑發帑銀二萬兩給四川饑民為耕具庚戌
復發銀三萬兩賑之辛亥余子俊卒乙卯馬文升為
兵部尚書丁巳召南京右都御史屠瀟掌都察院事
是月免順天蘇州太原諸府災糧三月癸亥命司禮
太監韋泰同馬文升簡閱京營兵馬乙丑寇犯宣府
獨石馬營壬申禱雨是月免陝西湖廣及鎮江災賦
夏四月庚戌慮囚辛亥免海災稅丁巳減浙江銀課
五月庚申河決開封命所司役五萬人治之甲子免

濟南諸府災糧六月丙午免應天諸府州去年災糧
秋七月壬戌勅兩畿錄囚癸亥諭禮部曰京師淫雨
為災南京復有風雷之異朕祗謹天戒當側躬厲行
文武諸臣其各加省飭時政缺失具以實聞戊寅給
畿內貧民麥種賑河間永平水災仍免其稅糧八月
壬寅勅孟密歸木邦侵地冬十月乙巳罷浦城銀冶
己酉慮囚十一月丁巳賑順天饑戊午發倉米平糶
于京師壬申撤馬兒罕取道廣東貢獅子鸚鵡帝曰
珍禽竒獸朕不受獻况來使不由貢道其却之是月
免鎮江及隆慶災賦十二月丁酉賑保定諸府水災

是月免順天開封諸府災賦

三年春正月丙子出京通諸倉米八十二萬石平糶於真定諸府二月壬辰開納銀例於貴州以備軍興三月丙辰命天下預備倉積糧以里數多寡為差不及額者罪之丁卯策試天下貢士賜錢福等三百人進士及第出身有差甲戌命兵部右侍郎張海左通政元守直閩邊是春免永平淮安開封襄陽諸府去年災賦夏四月丙戌寇犯宣府獨石五月甲子慮囚秋九月庚申停徵被災諸州縣雜辦丁卯免山東災

稅閏九月癸巳禁諸王勲戚勢要之家奏乞田土及
受人投獻冬十月辛亥慮囚庚申免河南災稅十二
月辛亥以星變勅羣臣修省陳時政得失壬戌減供
御物罷元宵燈火

四年春正月癸未以修省罷上元節假辛卯止郊祀
慶成宴癸卯馬文升以憂歸命葬畢起復視事甲辰
李敏致仕是月免太原西安諸府去年災糧二月乙
丑戶部左侍郎葉淇為尚書刑部左侍郎白昂為右
都御史己巳敕戒法司明慎用刑三月庚寅禱雨庚
子免河南諸府去年災糧夏四月乙丑命司禮太監
韋泰同法司慮囚是月免真定鳳陽漢陽諸府去年

災賦秋七月丙申免揚州去年災賦八月庚戌停蘇
松浙江今年織造己未封皇弟祐楷為壽王祐攄汝
王祐檉涇王祐樞榮王祐楷申王九月戊寅吏部左
侍郎彭韶為刑部尚書免桂林諸府去年災糧冬十
月癸丑慮囚戊午黃河溢賑開封懷慶歸德被災者
乙丑禮部尚書掌詹事府事丘濬兼文淵閣大學士
入閣預機務十一月庚辰江南饑停徵物料罪囚輸
米以贖留滸墅關鈔助賑是月免應天杭州諸府災
賦十二月甲子土魯番以哈密地及金印來歸
五年春二月丙寅命故忠順王脫脫從孫陝巴襲封

忠順王庚午以陝西歲歉減戍罷之半是月免蘇州松江杭州金華嘉興湖州及南和蘭陽諸州縣災賦三月戊寅立皇子厚照為皇太子大赦天下辛卯總督兩廣都御史閔珪總兵官毛銳討古田獐賊不利夏四月丁巳慮囚六月丁未免鳳陽諸府州去年災賦秋七月甲午賑蘇州松江及山東饑戊戌免順天災稅八月癸卯劉吉致仕乙卯遣使賑浙江水災乙丑停南京蘇松浙江額外織造召督造官還九月壬申虎刺撒國從海道貢方物却之冬十月庚戌罷寧夏捕豹丙辰慮囚賑惠州諸府水災壬戌貴州黑苗

叛命鎮守湖廣鎮遠侯顧溥會貴州巡撫都御史鄧廷瓚討之鎮守太監江惠監督軍務十一月乙亥除南京蘇松歲辦物料命軍民輸米佐賑授千戶等官不治事丙申塞溫處二府銀坑十二月己酉禱雪丁巳荆王見瀟有罪廢為庶人庚申除杭州諸府歲辦物料壬戌申嚴自宮之禁

六年春正月庚寅募人輸米貴州授散官二月癸卯賑南昌水災甲寅錄常遇春李文忠鄧愈湯和裔孫世指揮使丁巳以浙江左布政使劉大夏為右副都御史治張秋決河戊午命蘇州松江常州湖州留應

運米三十萬石河南留夏稅折銀各備賑三月庚午
免衛輝諸府去年災賦庚辰策試天下貢士賜毛澄
等三百人進士及第出身有差夏四月己亥土魯番
速壇阿黑麻襲執陝巴據哈密己酉以京師及河南
山東旱遣使祭告郊社山川命兵部右侍郎張海都
督同知緱謙經略哈密庚申慮囚命南京法司暑月
錄囚如京師辛酉久旱勅羣臣修省條特政五月乙
亥賑大興宛平旱災庚辰免黃州諸府去年災賦是
月寇犯寧夏閏五月乙卯王恕致仕是月免蘇州開
封諸府去年災糧六月庚午捕蝗壬申閔珪奏破古

田僮賊壬午耿裕為吏部尚書癸未免蘭陽儀封考
城水災稅糧辛卯禮部左侍郎倪岳為尚書秋七月
戊申召故右都御史屠濬掌院事庚戌彭韶致仕八
月丙寅白昂為刑部尚書甲戌免順天災稅九月免
河間開封西安諸府災稅己未慮囚冬十月丙寅以
四方災傷罷明年上元燈火庚辰停甘肅織造裁罷
十一月庚申賑京師流民十二月辛未開銀米事例
於保定六府賑荒己卯勅天下鎮巡官修省是月免
真定太原諸府災賦

七年春正月免順天開封諸府去年災糧二月甲子

以去冬電電風雨拔孝陵樹遣使祭告天地孝陵命
兩京羣臣修省求直言丙子賈俊致仕丁亥南京禮
部尚書劉璋為工部尚書是月免平陽襄陽南陽及
徐去年災賦三月癸巳鄧廷瓚平貴州黑苗庚子免
懷寧災糧戊申勅兩京有司督民捕蝗夏四月丁亥
慮囚五月甲辰命太監李興平江伯陳銳同劉大夏
治張秋決河秋七月丙午命工部左侍郎徐貫同巡
撫何鑑經理蘇松嘉湖水利庚戌土魯番入貢却之
九月丁亥以水災停徵蘇松諸府所辦物料并留濟
墅閔鈔戶口鹽課備賑己酉屠瀟為左都御史冬十

月己未慮囚壬戌役京軍萬人修治宮殿十一月壬子開中茶一百萬斤召商輸粟賑西安諸府饑十二月甲戌張秋河工成己卯勅曰甘州孤懸河外四鄰皆戎狄非他鎮比軍士所資畜牧而已近賊酋小王子潛止賀蘭山後頻入甘涼永昌莊浪去年夏秋之交及今年九月掠畜產各十餘萬軍士亦有遭驅掠者不贖卹之其何以能濟諸鎮巡官即發官帑賑被掠者家無牛種者給之其處置以聞是冬免順天平陽大同及陝西災賦

八年春正月壬子免成都諸府去年災糧甘肅總兵

官劉寧敗寇於涼州二月戊午丘濬卒乙丑禮部右
侍郎兼侍讀學士李東陽少詹事兼侍讀學士謝遷
入閣預機務己卯黃陵岡河口工成三月免鳳陽南
昌武昌諸府去年災賦夏四月壬午慮囚五月己丑
免應天諸府去年災糧六月甲寅西北野也克力諸
部款肅州塞求貢却之冬十月戊辰慮囚十一月己
酉免順德諸府災糧

九年春正月戊戌耿裕卒是月免應天常州鎮江太
原平陽及澤潞諸州去年災稅二月己酉朔屠瀟為
吏部尚書辛未遣右通政張璞大理少卿馬中錫閱

邊是月免順德開封諸府及徐去年災賦三月癸巳
策試天下貢士賜朱希周等三百人進士及第出身
有差閏三月丙辰免陝西災稅夏四月庚辰葉淇致
仕戊子吏部左侍郎周經為戶部尚書下給事中龐
泮等四十二人御史劉紳等二十人于詔獄尋釋之
己丑改倪岳于南京吏部乙未南京刑部尚書閔珪
為左都御史禮部左侍郎徐瓊為尚書丙午慮囚五
月丁未朔免青州去年災賦六月庚寅賑山陰蕭山
水災庚子免南昌諸府去年災賦秋七月癸亥劉璋
致仕八月乙亥朔工部左侍郎徐貫為尚書壬寅免

漢陽諸府去年災糧九月乙丑慮囚冬十月乙未賑
瀘及新津諸縣水災

十年春二月癸己免大同去年災糧三月戊申勅修
大明會典辛亥以旱蠲修省求直言遣使祭告郊社
山川癸丑免鳳陽諸府去年災賦夏四月辛丑慮囚
是月免太原平陽及丹徒去年災賦五月乙卯免應
天去年災糧戊辰小王子寇潮河川己巳寇大同六
月己卯命戶部左侍郎劉大夏兵部左侍郎李介理
宣府大同軍餉秋七月癸丑命都督楊玉領京營軍
駐永平備寇乙卯令大同招集土兵開納馬例八月

庚辰賑鄆水災九月乙巳賑濟南諸府水災庚申免
延安慶陽災賦冬十月壬申慮囚癸酉延安慶陽饑
許軍民納米贖罪授散官十一月戊戌朔賑成都諸
府水災庚子土魯番乞歸陝巴通貢

十一年春二月己巳小王子遣使求貢辛巳免太原
平陽澤潞汾去年災稅三月辛丑免西安延安去年
災賦夏四月甲戌免淮安徐去年災稅辛卯慮囚五
月己酉免青州兗州萊州去年災糧秋七月戊申免
慶陽諸府去年災糧己酉總制三邊左都御史王越
率師襲寇於賀蘭山後破之癸亥徐溥致仕八月癸

未賑祥符民被河患者冬十月丁卯慮囚丁亥清寧
宮災諭羣臣省躬思咎極言時政闕失遣使祭告郊
廟社稷山川罷明年上元燈火戊子免順天諸府災
稅十一月壬子罷陝西織造羊絨丁巳免廣西災糧
閏十一月丁卯免廣州諸府災糧己巳命自今壽節
祈報之外齋醮悉罷之十二月庚子命都察院榜禁
中外奢靡踰制者癸卯免彰德衛輝災賦壬子以清
寧宮災詔赦天下

十二年春二月免開封濟南大同諸府去年災賦三
月癸酉禱雨甲戌策試天下貢士賜倫文敘等三百

人進士及第出身有差夏四月癸巳申飭宣大延綏
邊備丙辰慮囚是月免贛州長沙諸府去年災賦五
月免淮安延安諸府去年災糧六月己丑朔土魯番
入貢甲辰闕里先聖廟災秋七月己卯遣使慰祭闕
里八月辛丑免彰德諸府去年災稅九月戊寅免淮
安徐災稅甲申重建清寧宮成冬十月己亥慮囚是
月免真定福州災糧

十三年春正月己卯禁民間收鬻軍器癸未免順天
去年災賦二月庚寅定問刑條例是月免鳳陽淮安
揚州大同去年災賦三月辛酉免山東去年災賦庚

午禱雨夏四月乙未開事例於浙江福建賑荒癸卯
寇入威遠乙巳平江伯陳銳充總兵官中官金輔監
督軍務戶部左侍郎許進提督軍務馳往大同禦寇
庚戌慮囚五月丙辰徐貫致仕己未白昂致仕癸亥
寇入大同左衛丙寅閔珪為刑部尚書工部左侍郎
曾鑑為尚書戊辰周經徐瓊致仕乙亥掌詹事府禮
部左侍郎傅瀚為尚書己卯左都御史侶鍾為戶部
尚書庚辰屠瀟致仕六月甲申停山西陝西採辦物
料免吉安諸府去年災糧己丑命馬文升曾鑑閱九
門城守具甲午南京禮部尚書倪岳為吏部尚書南

京刑部尚書戴珊為左都御史庚子召金輔陳銳還以太監扶安保國公朱暉代之秋八月賑南安泉州災民九月甲子免保定災稅冬十月戊子命司禮太監會提督官閱試京營武職庚子免慶陽及蕭碭災賦癸卯慮囚十一月壬戌免雲南荆山等四場銀課十二月寇再入大同是年寇大入延綏神木堡

十四年春正月免大同武昌諸府去年災賦二月己亥召還陝西織造中官是月免順天西安諸府災賦三月免濟南太原南昌諸府去年災賦夏四月庚辰工部左侍郎李銍督延綏諸處軍餉戊子史琳苗達

朱暉分道進師延綏戊戌停陝西山西一切物料甲辰慮囚五月庚戌賑大同被兵軍民除其稅糧丁巳開輸糧事例於陝西山西辛酉免延安諸府去年災賦戊辰遣使修闕里先聖廟六月甲申命貴州守臣討普安賊婦米魯戊戌寇犯延綏清水堡秋七月丁未朔秦寧衛賊入遼東長勝諸屯堡甲寅賑南城火災戊午寇犯宣府己未寇入薊州馬蘭峪癸亥命南京戶部尚書王軾兼左副都御史提督貴州軍務討米魯丁卯朱暉等率師襲寇于河套庚午分遣科道官清理屯田閏七月戊戌賑兩畿山西山東河南水

災癸卯免保安災賦八月丁未寇犯固原辛亥寇大掠韋州環縣萌城靈州己巳減光祿寺供應如元年之舊寇入寧夏東路是月免鳳陽淮安徐及大同災稅九月丁亥遣大理丞劉憲太僕少卿王質徃延綏甘肅陝西寧夏招募土兵冬十月甲寅倪岳卒甲子馬文升為吏部尚書戊午慮囚壬申總督兩廣右都御史劉大夏為兵部尚書十一月癸巳遣刑部左侍郎何鑑賑南畿山東災大理寺吳一貫賑北畿河南災山西鳳陽災傷勅巡撫賑之是月免真定鳳陽濟南諸府災賦十二月戊辰遼東大饑發太倉銀五萬

兩仍開輸米事例賑之是月免順天太平太原諸府
災賦

十五年春二月癸亥傅瀚卒壬申禮部左侍郎張昇
為尚書三月癸未召還督造磁器中官丁亥策試天
下貢士賜康海等三百人進士及第出身有差是春
免開封太原漢中諸府去年災賦夏四月壬寅朔命
順天府賑恤京師窮民乙丑慮囚是夏免狄道衡州
安慶諸府州災賦秋七月己丑普安賊平八月庚戌
以南京鳳陽風雨為災江水溢遣使祭告郊社孝陵
太廟鳳陽皇陵及山川之神勅兩京諸臣修省甲寅

免堵寧膚施諸州縣災賦九月丁亥慮囚戊子放減
所畜鳥獸乙未免開封災稅冬十月癸卯罷元宵烟
火十一月壬申瓊州黎賊符南蛇作亂庚寅免鳳陽
諸府州災糧甲午罷廣東採珠十二月辛亥帝以疾
不視朝是月免真定應天開封諸府災糧

十六年春二月辛丑始視朝戊申有事於南郊是月
免湖廣江西及銅陵去年災賦三月癸巳免平陽諸
府去年災賦夏四月癸卯免濟南諸府去年災賦乙
丑慮囚五月戊子以雲南迭奏災變命南京刑部左
侍郎樊瑩巡視其地察吏省民六月丙申朔減蘇杭

織造三之一壬寅免徽州災賦秋八月己酉免延安
災賦九月丁丑命清理淮鹽僉都御史王璟巡視浙
江旱災鳳陽廬州淮安揚州各遣使督賑兩畿山東
河南湖廣被災州縣撫按官通行賑恤壬午崇明海
溢命賑之并免其秋糧冬十月丙午慮囚戊午寇入
遼東長安堡十一月甲戌罷諸器皿營作及上元烟
火是月免蘇州鳳陽諸府州災賦十二月丁己免淮
安揚州及浙江所辦物料

十七年春正月辛未賑應天饑甲申罷採福建禽鳥
二月丙午復留漕糧十五萬餘石賑鳳陽諸府饑己

未申讖緯妖書之禁三月壬戌朔太皇太后崩是春
免順天安慶杭州武昌諸府去年災賦夏四月甲午
免開封諸府去年災糧已酉葬太皇太后丁巳賑淮
安火災閏四月辛酉朔闕里先聖廟成遣大學士李
東陽往祭告庚午免濟南諸府去年災賦乙亥以四
方災荒多盜命羣臣修省遣使祭郊社山川己丑慮
囚五月壬辰罷南京蘇杭織造中官甲午侶鍾致仕
壬寅召總制陝西軍務戶部尚書秦紘還理部事壬
子賑南陽水災丁巳申勲戚擾民之禁六月乙亥始
命南京五品以下官六年一考察癸未火篩犯大同

境秋七月癸巳工部侍郎李鋌大理少卿吳一貫通
政叅議叢蘭分道經畧邊塞朱暉充總兵官史琳提
督軍務苗達監督軍務備邊甲午左副都御史閻仲
宇通政司叅議熊偉分理大同宣府居庸等關糧餉
丙申開納銀復職例八月戊辰命天下撫按三司官
條奏軍民利病士庶建言可採者所司斟量以聞甲
申免鳳陽諸府州災稅九月辛卯慮囚甲寅以宣大
被寇命太常少卿孫交經畧邊事丁巳御煖閣諭劉
健等曰諸邊首功行巡按御史察勘動淹歲年至有
物故不沾恩命非所以示激勸也自今奏報宜以遠

近立限違者詰治且命講官進講宜開誠直言毋有
所諱是月免順天諸府災稅冬十月己卯免濟南諸
府災稅癸未秦紘致仕十一月辛卯寇入莊浪癸卯
南京兵部尚書韓文為戶部尚書十二月庚午申閑
糴之禁己卯寇犯靈州是月免鳳陽武昌諸府災賦
十八年春正月己丑寇自靈州掠韋州環縣命戶部
侍郎顧佐往理陝西軍餉甲辰寇陷寧夏清水營二
月免大同及隆慶德諸州縣去年災賦三月癸卯策
試天下貢士賜顧鼎臣等三百三人進士及第出身
有差免太原開封諸府州去年災賦夏四月丁卯免

安慶諸府去年災賦戊寅禱雨刑部侍郎何鑑處置
荆襄流民甲申慮囚是日帝不豫五月庚寅大漸召
大學士劉健李東陽謝遷受顧命謂健等曰東宮聰
明但年幼好逸樂先生輩其教之讀書善輔導之辛
卯崩年三十有六六月庚申上尊諡曰建天明道誠
純中正聖文神武至仁大德敬皇帝十月庚午葬泰
陵帝誠慤充粹言動必謹嘗曰吾不自治誰能治吾
日五鼓率起祝天每值水旱災異輒齋心露禱減租
宥罪惟恐後小民章奏披覽必盡臣下逆耳之言優
容茹納未嘗輕有譴罰雖微員末吏考察黜退如不

得已武臣邊帥尤加意軫恤愛惜財用宮中雜費皆有籍記特重名義論及後世青史恒為悚然中外方延頸望治忽罹大變升遐之日臣民攀號悲慟哭聲旬天其得人心如此

論曰明興百有餘年矣帝承累洽之後載其清靜以守之左右丞弼罔非耆碩治效之美太和在於宇宙間論者以宣孝比諸成康不其然與或猶以謂貴戚驕恣稍為盛德之累不知帝仁心為質用恩過多未免隣於姑息而遷改之速卒亦不害其為治則惡得以是而遂少之

明史卷十五

本紀十五

武宗

武宗諱厚照孝宗嫡長子也弘治五年三月立爲皇太子始以正嫡居儲貳故孝宗愛之每遊幸必從知其性好騎射亦弗禁也十八年五月辛卯孝宗崩壬寅即皇帝位大赦天下以明年爲正德元年戊申寇犯宣府總兵官張俊等迎戰于鹿角山敗績庚戌命太監苗逵監督軍務保國公朱暉充總兵官右都御史史琳提督軍務率師禦之秋八月甲寅尊皇太后爲太皇太后皇后爲皇太后九月丙戌免鳳陽災稅

丁酉賑陝西饑冬十月乙卯賜京縣民惇獨者布丙
辰寇犯甘肅庚午葬孝宗皇帝于秦陵十二月己巳
禱雪

正德元年春正月壬辰史琳卒戊戌改南京刑部尚
書張敷華為左都御史二月乙丑耕籍田癸酉罷採
買寶石西珠三月甲申幸太學釋奠于先師孔子戊
戌申自宮之禁夏四月丁巳馬文升致仕丁卯吏部
左侍郎焦芳為尚書是月免延安及葭涇諸州災賦
五月丙申劉大夏致仕丙午兵部左侍郎許進為尚
書六月辛酉免西安慶陽災賦秋八月戊午立皇后

夏氏是時帝始事微行冬十月戊午命太監劉瑾入
掌司禮監事丘聚谷大用提督東西二廠張永督十
二團營兼神機營魏彬督三千營是日劉健謝遷致
任壬戌焦芳兼文淵閣大學士吏部左侍郎王鏊兼
翰林院學士並入閣預機務丙寅免保定諸府災賦
乙亥許進為吏部尚書十一月丁丑免蘇州諸府災
糧辛巳兵部左侍郎閻仲宇為尚書甲辰除戶部尚
書韓文名十二月辛亥戶部左侍郎顧佐為尚書丁
巳命錦衣官日點閱給事中辛未免濟南諸府災賦
二年春正月癸巳召總制宣大右都御史劉宇回掌

院事尋轉左都御史閏正月壬子曾鑑致仕庚申工
部右侍郎李璠為尚書辛酉張昇致仕癸亥閔珪致
仕丁卯改南京吏部尚書李傑為禮部尚書己巳屠
勳為刑部尚書三月壬子召男子趙福等六十三人
養鷹于內苑辛未追論故大學士劉健謝遷尚書韓
文等五十三人為奸黨跪羣臣金水橋南宣勅戒之
夏四月丁丑免貴州災賦甲午劉宇為兵部尚書己
亥起致仕吏部尚書屠瀟為左都御史五月戊子度
僧道四萬人己巳復寧王宸濠護衛軍庶余外
臣僚舉謀勇出衆曉暢兵法者六月戊寅罷各邊修

築輸其費于京師秋七月戊辰免開封大同災稅八月庚辰令軍民納銀授散官丙戌作豹房居之九月辛酉李傑致仕冬十月丙子禮部左侍郎劉機為尚書丙戌改南京戶部尚書楊廷和為戶部尚書兼文淵閣大學士入閣預機務是時始遣使清覈天下錢穀出納總制巡撫以下官多以虧耗得罪詔獄為滿才二月壬午詔旌寧王宸濠孝行加歲祿二千石壬辰復開浙江福建四川諸銀礦是月免揚州太原諸府災賦

三年春正月辛亥大計外吏內批並黜翰林學士吳

儼御史楊南金二月己巳朔令京官病滿一年者致
仕丙子屠勳致仕南京右都御史王鑑之為刑部尚
書三月壬子策試天下貢士賜呂柟等三百四十九
人進士及第出身有差壬戌增陝西河南山東山西
解額是春劉機以憂去起前南京戶部尚書周經代
之夏四月乙亥令軍民輸銀者得授都指揮僉事以
下官六月壬辰朝罷得匿名文書御道上傳旨跪羣
臣承天門外詰責之執付詔獄者凡三百餘人經宿
乃釋秋七月壬子令天下精選通音樂者送京師充
三院樂工八月癸酉許進致仕己卯改劉宇吏部卒

已立內厰劉瑾自領之戊子兵部左侍郎曹元為尚
書山東盜起庚寅逮韓文下詔獄罰輸米千石于大
同癸巳顧佐致仕九月庚子免鳳陽諸府災賦壬寅
戶部右侍郎劉璣為尚書庚戌諭戶部凡輸米贖罪
者各刻期完納違者罪之辛酉逮劉大夏下詔獄戌
蕭州癸亥賑南畿及延綏諸府饑冬十月辛未命工
部侍郎畢亨賑湖廣河南饑丙子周經致仕己卯以
吏部左侍郎白鉞為禮部尚書十一月乙未朔命南
京侍郎王瓊賑鳳陽諸府饑十二月丙寅南京刑部
尚書洪鐘為工部尚書庚辰禱雪

四年春正月癸丑王鑑之致仕丙辰改洪鐘刑部以
兵部侍郎才寬代之庚申賑丹陽金壇饑二月丙戌
黜劉健謝遷為民命自今餘姚人不得官京師庚寅
免沂莒霑化諸州縣去年災糧三月甲辰賑浙江災
己酉詔吏部得非時考察京官是月免順天武昌諸
府災賦江西盜起夏四月乙丑才寬兼左都御史總
制延綏寧夏甘肅軍務乙亥王鏊致仕六月戊子劉
宇兼文淵閣大學士入閣辦事宇乞省墓歸庚寅吏
部左侍郎張綵為尚書秋八月辛酉朔始遣使四出
清覈屯田乙亥免同朝邑諸州縣災賦是時兩畿及

湖廣陝西四川廣東廣西盜並起閏九月乙丑免延
安災稅丁亥屠瀟致仕是月寇犯延綏冬十月己丑
改南京戶部尚書陳金為左都御史十一月甲子寇
犯寧夏乙酉洪鐘兼左都御史掌院事十二月丁酉
刑部左侍郎劉璟為尚書庚子工部右侍郎畢亨為
尚書庚戌追奪劉健謝遷等六百七十五人誥命
五年春正月己卯裁江西解額仕者不得為京職庚
辰籍故尚書秦紘家二月癸巳曹元為吏部尚書兼
文淵閣大學士入閣辦事戊戌兵部左侍郎胡汝礪
為尚書尋卒三月丙寅兵部左侍郎王啟為尚書卒

未免正德三年逋賦乙酉洪鐘總制川陝湖廣河南
軍務并理湖廣賑恤事夏四月庚寅安化王寘鐻反
甲午寇入莊浪巡撫張翼等敗却之己酉削安化王
寘鐻爵起右都御史楊一清總制陝西寧夏延綏甘
涼軍務神英充總兵官率師討之辛亥詔赦天下太
監張永總督寧夏軍務是日寧夏遊擊仇鉞襲執寘
鐻以獻五月癸未焦芳致仕六月庚子帝自稱大慶
法王西天覺道圓明自在大定慧佛命所司刻印以
進秋七月寇入臨水堡八月甲午執太監劉瑾繫于
菜廠丁酉下獄詔政令自正德二年後所更者諸司

悉詳正以聞戊戌治劉瑾黨罪下張綵等于獄己亥
曹元劉璣罷下未復革寧府護衛軍戊申劉瑾伏誅
己酉雪謫戍諸臣之誣枉者辛亥起前禮部尚書劉
機為吏部尚書楊一清為戶部尚書九月乙卯免濟
南諸府災賦賑太平諸府水災戊午掌詹事府吏部
尚書劉忠南京吏部尚書梁儲並為吏部尚書兼文
淵閣大學士入閣預機務己未封太監張永兄富弟
容皆為伯丙寅改工部尚書畢亨于南京壬申李鏊
為工部尚書免寧鄉災賦以平寧夏功封義子朱德
太監谷大用兄大寬馬永成兄山魏彬弟英皆為伯

壬午禮部左侍郎費宏為尚書冬十月己亥張綵伏誅乙巳赦霸州賊劉七等三十四人罪未幾復叛是月免應天嘉興諸府災稅十一月丁丑免彭水武隆災賦十二月戊申劉機劉璟皆致仕是月免湖州及渾源馬邑諸州縣災稅

六年春正月甲寅改楊一清吏部南京兵部尚書何鑑為刑部尚書是月免鳳陽濟南諸府及綏德諸州縣災賦二月壬辰賑應天九江諸府饑己酉以江西賊勢轉盛起前左都御史陳金總制軍務討之三月乙丑策試天下貢士賜楊慎等三百五十人進士及

第出身有差庚午寇亂河套犯沿邊諸堡惠安伯張
偉充總兵官右都御史馬中錫提督軍務帥京營銳
卒討畿輔山東賊丙子免所在被寇者稅糧一年夏
四月癸未劉忠致任五月戊午王啟罷仍掌通政司
事庚申免華渭南諸州縣去年災賦壬戌改何鑑兵
部六月甲午山西盜起秋七月癸酉以畿內山東河
南賊勢益盛始發邊軍討之八月己卯兵部侍郎陸
完提督軍務討賊四川賊首藍廷瑞鄔本恕等二十
八人被擒伏誅甲申賊劉六等犯固安京師戒嚴召
見閣臣于左順門商防禦機宜發帑銀二十萬兩賑

被寇州縣九月己酉廣西徭賊平庚午以義子朱寧
掌錦衣衛事冬十月甲申賊劉六等焚糧船千二百
十八艘是時亦卜刺等入居西海屢犯甘肅山丹俱
為邊將所敗十一月庚戌太監谷大用總督軍務張
忠監管神鎗伏羌伯毛銳充總兵官統京軍會陸完
勦賊丙辰命戶部侍郎叢蘭王瓊賑被寇州縣辛酉
以京師地震令百官修省乙亥命用兵所在瘞暴骸
十二月癸巳費宏兼文淵閣大學士入閣預機務以
吏部左侍郎傅珪代之庚子益發邊軍討賊是月免
西安諸府及長興諸縣災賦

七年春正月甲寅賊劉洪等犯霸州京師戒嚴二月
丙子朔巡撫保定右副都御史彭澤同咸寧伯仇鉞
提督軍務太監陸閻監督軍務討河南賊三月陸完
連敗賊劉六等于山東夏四月戊子發天津德州臨
清倉米賑饑內山東饑是月仇鉞敗劉惠趙燧等于
光山五月甲寅陳金討撫州賊平之丁巳南贛巡撫
周南討汀州太帽山賊平之是月賊劉六敗死閏五
月己丑亦卜刺寇甘肅壬辰仇鉞討河南賊平之秋
七月己卯召南京右都御史李士實掌院事丁酉賑
四川饑八月癸亥陸完討賊劉七等平之九月乙酉

陳金討華林賊平之戊子以彭澤為右都御史代洪
鐘總制四川丙申賜義子百二十七人國姓冬十月
甲子增建豹房室宇是月免紹興諸府被災河南江
西被寇稅糧十一月壬申都督僉事時源為平賊將
軍充總兵官會彭澤討四川賊丙申免登州被寇通
賦是月留大同宣府遼東軍于京營號外四家軍十
二月壬寅洪鐘致仕壬子刑部左侍郎張子麟為尚
書丁卯李東陽致仕是月免兩畿山東山西河南陝
西被災寇稅糧

八年春正月癸酉命副都御史俞諫代陳金提督軍

務討江西賊乙酉以遷將江彬許泰分領京營尋並
賜國姓癸巳戶部侍郎叢蘭僉都御史陳玉巡視邊
關是月免順天鳳陽西安災賦二月丙午以平賊功
封谷大用弟大亮陸閭姪永皆為伯癸亥賑保定諸
府饑三月戊寅復申自宮之禁丙戌寇大舉犯大同
甲午以早詔百官修省夏四月癸卯貴州巡撫沈林
討鎮筓苗賊平之戊午復開輸銀授官贖罪例乙丑
彭澤破賊于劔州斬賊首廖麻子五月辛未禱雨辛
巳寇分道犯大同命仇鉞充總兵官率京軍禦之六
月戊戌朔河決黃陵岡辛亥孫交傳珪致仕乙卯俞

諫破桃源賊首王浩八誅之丙寅戶部左侍郎王瓊
為尚書吏部左侍郎劉春為禮部尚書秋七月己巳
免順天諸府災稅八月丁酉免蘇州諸府水災稅糧
九月甲戌俞諫等破桃源賊首胡浩三誅之癸未免
大同開封諸府災稅十一月己巳何鑑致仕以陸完
代之丁丑李士實致仕癸未免寧波諸府災糧十二
月己亥兵部左侍郎石玠為右都御史甲辰命南京
刑部侍郎鄧璋賑江西饑己酉禱雪癸丑免平涼災
稅

九年春正月丙寅命廷臣舉謀勇出衆堪任將領者

乙亥詔致仕官貧不能自給者有司存卹之壬午以
乾清宮災詔羣臣修省極言時政缺失二月庚子微
行至教坊司丙午掌詹事府禮部尚書靳貴為禮部
尚書兼文淵閣大學士入閣預機務戊申賑永平諸
府饑仍免其稅糧癸丑彭澤討四川賊平之三月戊
寅策試天下貢士賜唐臯等三百九十六人進士及
第出身有差夏四月丁酉再復寧府護衛軍並屯田
與之癸卯彭澤進左都御史五月乙丑費宏致仕己
丑以土魯番據哈密詔彭澤總督甘肅軍務經理之
六月乙卯開雲南大理楚雄臨安銀礦以鎮守太監

梁裕董其事秋七月乙丑寇犯宣大命張永提督軍
務都督白玉充總兵官率京營軍禦之丙子免順天
河間保定及陝西災賦是時寇小王子大掠近邊警
報日急八月辛丑遂犯白羊口及浮圖峪畿輔震動
戊午復犯寧武闕忻州定襄寧化是月免應天真定
平陽災賦九月壬戌寇犯宣府蔚州癸亥免鳳陽諸
府災稅陝西進鋪花羶帳一百六十二間庚午帝視
虎園被傷不視朝冬十月己酉命工部侍郎劉丙採
米川湖十二月甲寅以建乾清宮詔加天下賦凡一
百萬兩

十年春正月癸亥薄暮享太廟戊辰薄暮郊祀天地
是時帝日與羣小弄兵走馬微行視朝聽政諸務俱
廢廷臣交章切諫皆不聽寇犯潮河川二月乙卯寇
犯延綏寧夏是月免鳳陽諸府及徐滁今年災稅又
免萬年被寇夏稅三月壬申楊廷和以憂去四月壬
子賑通武清漕饑閏四月辛酉楊一清兼武英殿大
學士入閣預機務庚午改陸完吏部己卯改王瓊兵
部五月戊子石玠為戶部尚書甲午吏部左侍郎王
璟為右都御史召彭澤掌院事秋七月己亥重修太
素殿八月庚申賜京縣民惇獨者布丙寅寇大舉犯

花馬池入固原是月劉春以憂去以吏部左侍郎毛紀代之冬十月甲子免長洲嘉定常熟災糧十一月丙午免杭州湖州台州災稅己酉遣太監劉允迎番僧于烏思藏賜法王金印十二月乙丑禱雪己卯免鳳陽淮安揚州廬州及徐災糧

十一年春二月壬申作中軍自領之大閱于西苑夏四月丁巳禱雨戊寅發帑銀賑河南饑五月己丑賑陝西饑庚寅土魯番以哈密城來歸甲辰錄自宮者三千四百六十八人充海戶六月丁巳遣太監浦智往蘇杭織造秋七月甲午免兗州諸府災賦乙未寇

大舉犯薊鎮白羊口。命左都督劉暉充總兵官，率東西官廳軍禦之。丙午，命工部侍郎趙璜、俞琳整飭畿內武備。八月丁巳，左都御史彭澤提督東西二路邊關。成國公朱輔充總兵官，同禦寇。癸丑，免順天、永平、保定、河間及大同、西安諸府災稅。庚申，賜京縣民被寇者米二石。甲子，楊一清致仕。丁丑，掌詹事府禮部尚書蔣冕為禮部尚書，兼文淵閣大學士，入閣預機務。九月丁亥，改毛紀掌詹事府。召南京禮部尚書李遜學代之。庚寅，免濟南、鞏昌諸府災賦之半。冬十月，免順天、池州及開封、泉州諸府災賦。十二月己巳。

賑河間水災乙亥免鳳陽淮安揚州及徐災賦

十二年正月己丑躬祀天地于南郊遂如南海子縱獵夜半乃還庚寅頒獲于羣臣壬寅土魯番速壇滿速兒復據哈密犯肅州二月己未免鞏昌去年災糧辛未賑順天保定永平饑三月己丑免大同災賦庚寅策試天下貢士賜舒芬等三百五十人進士及第出身有差壬辰賑襄陽諸府饑戊戌開僧道官及知印承差吏典納銀例並以淮浙四川河東益課充陝西織造費夏四月辛亥免保定去年災稅壬子靳貴致任丙辰甘肅副總兵鄭廉等敗土魯番于瓜州五

月丙子毛紀兼東閣太學士入閣預機務癸未如石
經山寺數日乃還壬辰如南海子乙未彭澤致仕戊
戌如畏吾村開廣東番舶之禁六月乙卯刑部左侍
郎張綸為右都御史丙辰李遜學罷壬戌吏部左侍
郎毛澄為禮部尚書王璟為左都御史八月甲辰朔
徵服如昌平乙巳梁儲蔣冕毛紀追及之沙河疏請
回蹕不納己酉將出居庸關守關御史張欽闔關門
以拒使者乃還丙辰至自昌平戊午夜御奉天殿視
朝己未賑河間保定真定大名順德廣平饑癸亥命
副都御史吳廷舉賑湖廣饑甲子賑應天饑仍免其

稅糧丙寅徵服出居庸關辛未遂如宣府命谷大用
守關毋出京朝官九月甲戌朔駐蹕宣府營鎮國府
第居之辛卯河決城武免河間諸府災賦壬辰駐蹕
陽和自稱總督軍務威武大將軍總兵官一切軍政
皆以大將軍鈞帖行之庚子發戶部銀一百萬兩輸
宣府備賞勞冬十月癸卯朔駐蹕順聖川甲辰寇犯
陽和掠應州帝親督諸軍禦之連戰五日幾被陷戊
申寇引去乃還大同十一月丙戌府江賊平丁亥楊
廷和復入內閣賑廬鳳淮陽水災戊子帝還宣府十
二月壬子免鳳陽諸府災糧癸亥內閣九卿諸臣將

詣行在請回蹕至居廡關不得出而還閏十二月丁亥迎春于宣府備設諸戲

十三年春正月乙巳賜羣臣斗牛飛魚蟒麒麟虎彪等服丙午至自宣府羣臣奉詔服曳撒大帽鸞帶及所賜服具綵帳羊酒銀幣郊迎帝御帳殿閣臣奉觴稱賀丁未郊祀當致齋罷之庚戌躬祀天地遂獵于南海子己未賜文武羣臣銀牌文曰慶功賞功辛酉復如宣府是月賑兩畿水災廩所在流民瘞其死者二月己卯太皇太后崩壬午至自宣府三月戊辰如昌平四月己巳朔謁六陵遂獵于密雲五月己亥朔

駐蹕喜峰口癸亥張子麟歸省六月庚辰太皇太后
梓宮發京師帝戎服馳馬隨其後甲申葬孝貞皇后
于茂陵乙酉至自昌平秋七月己亥帝將如塞上自
稱總督軍務威武大將軍總兵官朱壽傳旨命內閣
撰勅內閣九卿科道諸臣並至左順門泣諫不納錄
應州功陞廢及賞者五萬六千四百四十九人丙午
發京師丁未度居庸關仍戒守者毋出京朝官遂歷
懷來保安諸城堡駐蹕宣府己酉南贛巡撫王守仁
討江西峯賊廣東泃頭諸賊悉平之乙酉如大同九
月庚子次偏頭關癸丑降手勅曰總督軍務威武大

將軍朱壽親統六師肅清邊境特加封鎮國公歲支
祿米五千石吏部如勅奉行復內批令於後軍都督
府帶俸甲寅封朱彬朱泰皆為伯冬十月戊辰渡黃
河西辛巳卯次榆林十一月庚子以火牌調西官廳
勇士四衛營兵赴宣大壬子次綏德州幸總兵官戴
欽第納其女十二月戊寅自榆林歷米脂綏德渡河
幸文水諸州縣戊子次太原納樂工妻劉氏是冬免
兩畿山東江西災賦

十四年春正月壬子還宣府二月壬申至自宣府羣
臣迎接視去歲儀賜銀牌亦如之丁丑躬祀天地遂

獵于南海子己丑復降手勅諭吏部曰鎮國公朱壽
宜加太師又諭禮部曰總督軍務威武大將軍總兵
官太師鎮國公朱壽今往兩畿山東祀神祈福三月
癸丑以諫南巡下兵部郎中黃鞏等六人于詔獄罰
翰林修撰舒芬等百有七人跪午門五日杖金吾都
指揮僉事張英乙卯命桎梏鞏等六人跪之午門下
大理寺正周敘等十人詔獄丙辰下行人司副余廷
贊等二十三人詔獄尋命桎梏跪午門如鞏等戊午
杖芬等百有七人于闕下是日風霾晝晦夏四月甲
子朔免廬鳳淮揚四府徐滁和三州災賦乙丑賑應

天諸府饑戊寅杖黃華等三十九人于闕下先後死者十二人辛巳石爇致仕五月己亥詔山東山西陝西河南湖廣流民歸業者官給廩食廬舍牛種復其賦五年辛丑總督倉場戶部尚書楊澤回部管事庚戌詔五府九鄉科道撫按三司官各舉將才六月丙子序主宸濠據南昌反戊寅陷南康己卯陷九江庚辰提督南贛副都御史王守仁起兵討宸濠秋七月丙午宸濠寇安慶都指揮楊銳知府張文錦固拒之辛亥王守仁會兵擣南昌克之甲辰傳旨親征宸濠是日復傳旨宸濠恃逆天道將犯南京其令總督軍

務威武大將軍總兵官太師鎮國公朱壽親統邊軍討之又命安邊伯朱秦為威武副將軍率師先發丙辰諭廷臣敢阻親征者處以重法丁巳削宸濠封爵絕其屬籍是日王守仁敗宸濠于樵舍禽之八月壬戌朔命朱彬提督東廠錦衣衛戊辰以南征告于郊廟癸未發京師梁儲蔣冕扈從丁亥次涿州得王守仁告捷疏秘不發戊子次保定九月壬辰朔宴于府堂癸丑駐蹕臨清召劉姬不至自趨張家灣載之俱南道遇湖廣叅議林文績入其舟奪一妾而去是秋免蘇州諸府災稅冬十月辛未復至臨清癸酉免蘭

河隴西諸州縣災賦十。一月辛丑自徐州御龍舟順
流而南乙巳漁于清江浦大索民間鷹犬珍寶古器
壬子長至幸中官張陽第受朝賀己未次寶應漁于
汜光湖十二月辛酉朔次揚州大索民間處女寡婦
壬戌獵于城西遂幸上方寺戊寅閱女伎于揚州己
卯次儀真癸未漁于新閘臨視大江甲申幸儀真民
黃昌本家閱太監張雄等所選伎以其半送御舟丙
戌至南京是月免畿內及河南災賦

十五年春正月丁酉迎春于南京備設諸戲如宣府
是月免鳳陽淮安揚州及武昌諸府災賦三月庚寅

免寧遠災賦夏四月己未賑淮安諸府饑五月辛丑
免寧國池州太平安慶災糧六月丁巳朔幸牛首山
遂宿焉諸軍夜驚左右皆不知帝所在大擾久之乃
定秋七月寇大舉犯宣府大同八月丙辰朔廣東兵
討蘇峒賊平之是月免鳳陽諸府及江西災賦閏八
月丁酉發南京壬寅漁于江口九月辛酉駐蹕淮安
總漕都御史叢蘭總兵官顧仕隆等進賀功金牌綵
帳帝戎服簪花鼓吹入城丙寅至清江浦復幸張陽
第己巳漁于積水池舟覆溺焉左右掖之出自是遂
得疾是月免順天永平保定河間及鞏昌臨洮災稅

冬十月乙巳免大同災賦庚戌至通州十一月庚申
治交通宸濠者罪執陸完赴行在十二月己丑佛郎
機入貢甲午還京師帝戎服乘馬以入遣使以凱旋
告郊廟社稷丁酉躬祀天地初獻疾作不克終禮臥
齋宮翼日乃還壬子改王瓊吏部是月免保寧順慶
及西安大同諸府災賦

十六年春正月乙卯免鳳陽淮安揚州及徐災糧已
未祔孝貞皇后于太廟疾甚不克行禮壬戌兵部左
侍郎王憲為尚書二月癸巳廣西副總兵張祐討古
田蠻賊平之己亥雲南巡撫何孟春討彌勒州苗賊

平之三月庚申改團營西官廳為威武團營乙丑大
漸諭太監陳敬蘇進曰朕疾殆不可為矣爾其語司
禮監官以朕意達之皇太后天下事重其與閣臣審
處之前此事皆朕自誤非汝曹所能預也丙寅崩于
豹房年三十有一是日楊廷和請于皇太后傳遺旨
罷威武團營遣各邊軍還革京城內外皇店縱遣豹
房番僧及教坊司樂人戊辰以遺詔釋諸司繫囚還
四方所獻婦女停不急工役收宣府行宮金寶于內
庫庚午皇太后懿旨執江彬等下獄五月己未上尊
謚曰承天達道英肅睿哲昭德顯功宏文孝毅皇

帝九月庚午葬康陵

論曰遊畷之荒至帝而極矣將軍為號義子幾千百人不知自底弗類胡乃如此且其時誰秉國鈞而忍為坐視之也當夫興藩未入天位曠虛即宗社僅懸于一綫嗚呼抑已危矣是故二正之不亡雖曰以其人亦天未大厭明德之故耳不然以人國為徼倖老成弼亮者固如是乎恐于楊諸臣亦無以自解免于東隅之失矣噫